

四庫全書

集部

欽定四庫全書

知非堂稿卷四

元 何中 撰

七言古詩

與甘東溪

風吹嶽倒黃河傾漢家老死飛將軍洛陽宮門銅駝哭
哭聲遏盡南征雲忽忽五馬歸何處吳山楚水相吞吐
英雄豪傑笑殺人新亭揮淚中流語佳人別去吳王臺
空餘舊曲令人哀往時射策談江北夷甫諸人安在哉

春風吹老千桃李短笛淒絃風雨裏荷衣蕙帶漫逍遙
杜若洲邊雁聲起君不學少年快馬曹景宗步逐狡兔
彎强弓君不能少游欸段居鄉曲得稱善人 闕

何悲辛彊把哀吟感鬼神高堂夢斷行雲杳雙

蛾翠黛為誰春華陽雪落江南暮江花江草蛛 闕 露人

生何處無知心背人瀟瀟雙飛去為君起舞為我歌古
來賢聖良蹉跎區區離合若為動羅敷陌上感慨多山
中仙人最高潔不比常人夙葦血願君舉似經畋詩今

古何曾異明月

經畝有山中仙人歌
東溪常稱之故及

漢宮春

君不見漢宮六六多佳麗
露花半染雲裾翠
少翁招得
夫人魂
孤鸞夜啼月波墜
趙家姊妹專風流
雙蛾不識
人生愁
夫容並蒂歌一朶
西飛青鳥徒離憂
飛龍翩翩
上天去
雲幕椒房土花雨
墮膩埋胭恨未消
香魂尚寄
寒莖舞人間
炎日焦衆芳
肯隨葵藿來傾陽
柔情幽怨
透地脉
烟悵寂寞彊成粧
誰吹舊曲緣雲切
寸心婉婉

應愁絕綠羅幾疊御賜衣紅綃半點守宮血淒兮媚臉
棲餘妍遙憶羊車望幸年至今一片巫山雨化為飛烟
空潸然故家陵苑孤雲外綠樹如雲草如海殷勤唯有
虞美人同向牆陰弄晴靄

春怨

洛人傾國賞牡丹東家綉轂西家園黃鸝紫燕新得意
柔雲如酥花迷魂遊人寂寂歸何處花亦年年占風雨
江南却遇李龜年蘇州空感楊開府誰吹玉笛斷人腸

斜橋淺淺流水香惟有十年老銅狄看盡人間幾夕陽

又

天女手剪五色雲鞭雷控電行青春散作江南萬錦繡
燭龍眩轉空無塵燕兒眼寒心更苦吳娃情酣夢無據
依然錦綉化為雲却恨風來挾雲去十二樓邊芳草多
知今鸚鵡聽誰歌千金買取新豐酒地久天長奈樂何

讀羅時翁燕山行稿

去年送君萬里行英雄氣富乾坤貧今年君歸未會面

燕山行卷驚倒人我從江南想江北八陵草暗孤雲白
夜窻燈火讀君詩一段奇愁貫地脉燕山山水負雄奇
千五百年君有期荆卿等輩了不見咄咄怪事令人悲
黃河西來走東注太行山高壓中土河山壯觀帝王州
萬雉城荒土花雨宣和玉輦去無蹤蕭條艮岳搖秋風
東霸城邊見銅狄廣武戰處思英雄天地空荒形勝老
兒女終身不能到北征詩後斷無人騎驢獨向長安道
長安道上新豐徒怪此却與南人殊天下久無快意客

此客乃爾雄牙鬚即事非今亦非古牛鬼蛇神萬妖舞
十里萬里種奇語要與嵩華爭步武人間官不直一錢
歸來添得詩一編堂上稱觴拜親壽膝下讀書忘歲年
要狂即狂已即已丈夫做事當如此何由相見共君談

寄詩問訊聊復爾我今山中一處子滄洲滄洲天下士

滄洲時
翁自號

用歐陽文忠公神清洞韻題羅士鼎所藏朱元

暉神清洞圖

潁陽之山翠烟深仙人不見勞我心
聚峰我我照空廓
白雲欲飛石欲落此中不著人間客
採藥歸來花滿石
想當飛鳥墮層崖數聲清嘯驚瑤臺
羣山蒼蒼今在眼
舉手招之殊未來潁陽之山夜鶴飛
仙人不見歸何時
神清之洞有幽客應向洞中煮白石
洞前岩下仙家春
幾片落花雜飛溜高下樓臺縹緲霞
綠樹不老青山壽
王生邢子意殊勤恨我隔此浮空塵
安得碧雲千萬疊
棲此人間謫墮身

又

元暉昔作西江客
夜飛墨花曉無跡
春風留此二百年
幸是山中至人識
有千黃金雙白璧
鵝溪白蠟纔數尺
潁陽山高風露寒
幾處高堂掛生色

題曾子文靖節詩注

一馬東浮南北分
吳宮桃李春正喧
英雄慷慨有餘恨
誓江直欲清中原
五山忽拔神仙宅
長風吹轉銅駝陌
乾坤千古此哀新
琵琶有聲言不得
當時縈損君黛

眉意欲恤締終投機山能平地心非石賓王從此自緇
衣夜看五柳先生傳長恨斯人不吾見難將逆裕逌春
秋此身不是甘貧賤十載東籬一世豪君今躡此清風
高零陵哀憤從誰語心不與契安和陶琴本無聲亦無
趣悠然忘返中情寓一編箋出許多愁奈何此世非劉
裕杜陵正值落花天江南又見李龜年傷君曲調空遼
絕吞聲獨咽山中泉

中秋走筆

忽忽不知秋已中起來望盡江之東天風吹上一片月
萬古有盡明無窮自歌自酌自起舞失喜墮在明光宮
須臾見雲不見月九州之外俱昏濛我狂絕叫天何聰
乾坤如此寧忽忽江流冥冥上有楓雲邊又叫南蜚鴻
有酒且醉無酒可有月不與無月同大夫意氣見石裂
直欲掃裂雲皆空低徊一笑良自悟事與變會誰其逢
仰看雲月勿復道西風落山人睡覺

塞野縱目

讀書萬卷不經濟
懶境最佳工坐睡
手持綠玉信步行
穿破麥花到松際
縈回空谷含幽光
隱映深松發清吹
北風掠野牧者誰
牛影參差霜草悴
一牛閒卧意方安
童子何知鞭已至
回頭一望近天南
高下千峰洒濃翠
近村遠浦合寒霏
落木平林歸暮氣
世工善畫貴逼真
悠悠真境誰能契
古來文章亦如此
真處看來有深味
競為幻語欲幻人
敢向人前辨醒醉
歸來歸來勿為留
幸有禽聲媿魚沸

道傍湖中小白蓮花清香可愛野人名曰玉蓮
浮葉團團缺一角開花皎皎玉新琢洛神湘妃不足倫
太白醉魂寄蕭索過客誰能知妙香春風奇稟勞陰陽
可憐有此白玉質謫在江南荇藻行古來名花傾城國
綠珠樓下沉香北幽然更用世人看搖蕩平湖水天色
高困四時歌

春風東來汎幽谷出門一笑人間綠新雨池塘柳帶鶯
嫩雲洲渚沙眠犢下蓁一笠東西村天高地下斯人存

歸來醒醉聊隨意翠樹無言花滿門

又

陽烏炎炎焦九土老農吁嗟氣如縷山中神化出移時
一片閒雲半溪雨誰家金谷有涼臺葵扇桃笙爭自媒
清風却在長松下不須用智不須才

又

楊柳磯頭天萬里長笛一聲風不起翠灑千峰日映烟
清涵雙澗霞通水季鷹底事却思歸豈是鱸魚輕別離

晚知尤悔又何益灣頭釣竿君好持

又

寒鴉萬點落葉赤山風蕭蕭野日白池上梅花俱有情
林間茅舍元無客人言梅花知歲寒花亦偶然冰雪間
向來羣芳今欲盡蘭芽已動春將還

宿紫玄洞天

閒招雙白鶴駕我吹玉笙去謁紫玄君飛飛入青冥石
古天風吹不剝銀漢殘波崖畔落萬年碧樹春長花花

間弭節聽天樂戲拈北斗柄細酌瑤露團八面烟霞滄
海曙四垂星月碧天寒珊珊曉珮人間去萬頃飛塵入
揮塵徜徉九縣賣金丹邂逅千秋人未度

羅士從真一酒歌

大槽壓白流醴泉小槽滴紅血啼鵲多誇妙味觴玳筵
詎知毒留不可湔工調錦瑟思華年薰風阜民纔五絃
法吏廉潔終申韓闕睢麟趾意莫傳岷峨之山來坡仙
鞭鸞駕鳳嬉人寰黼黻王度勲柱天餘事與酒究本源

坡仙仙去今幾年真一秘法空遺編余頑居士何曾頑
乾坤萬事俱精妍冥參真一忘蹄筌高

闕

麥塵霏玉鮮

淵明林顥珠明蠲幽澗汲月分清漣水火交濟陰陽全
三投釀令味溫妍甘芳周徹客流涎杜儀足蹈舞九原
揚箴劉頌俱浪言皂隸八仙奴七賢持澆朽骨應汙顏
東風吹綠花盈川冷冷鶯吭韻清圓此時一酌神超然
至和氣象身周旋頓挽淳風追古先如此無懷大庭前
回視鏤薄吁可憐若真若一物何難甘為弊法相牽纏

治道貴簡不貴煩為君長歌真一篇

墨梅

吐吐喈喈夥奇哉維摩引臂何方來忽而玄雲飛出老
龍黑黯之鱗甲乃是鈹鈹不剝之枯苔三桠兩杈鐵作
髯十點五點小者如珠大者如雪踈闕驚失正視似龍
非龍徐看畫得蜀苑吳仙梅梅花江南闕童亦指點毫
髮不相似抨彈古閃閃燕山飛雪飛無時闕貴梅一枝
安得戰材二百五十疋煩君多闕短幅闕火室

贈陳仲實

春風吹空雨漠漠

闕

繞几簾不捲燕子

闕

濕

衣花草生客來

闕

數口疊疊撐眼直

闕

晚傍

無人醒我蕭條

闕

不齊須臾反覆渠得知馬前之奴

忽極品

闕

貧中富賤中貧金谷樓下花滿園不知仲

蔚

闕

印堆床十九枚不知敗絮牛衣那得是子陳還

是

闕

車如流水馬如龍相逢好為細說少年行

寄題疎山寺半閒禪房

往時汧汭盱母川李花陰陰曾繫船
丰茸沙草取幽徑扣關一禮白雲禪
千柱空廊絕人跡蒼苔亂點蜚紅妍
松香四襲翠滴雨江影半侵明暎烟
鸛鶴流聲出幽谷輕霏忽散風鏘然
長哦欲寫不能就每寄清夢時周旋
秋風吹空客如仙名山有記時相傳
廼知曇花解重現彈指一瞬五百年
經閣杳臺雪幾春戲成小果留人天
先師吾鄉白雲寺卓錫尚令題榜鮮
半閒之半可著我呼童亟辦青行纏
身前舊境餘一念定許鄰舍香茅編

別高申伯

江南浩蕩春風滑信意南遊可奇絕神光直射瘴雲開
陸賈先聲到南粵南粵候子一千六百里春風却在梅
關裏關頭飲罷卓錫泉前迎無限佳山水最好望韶亭
上看三十六峰太古之色拂天半恍若后夔騎鳳從天
來帶得虞庭九奏韶音回此時彷彿聞之應思虞舜不
忍去唯有山風海月相追陪舜峰之下韶陽廟忝心餒
魂何足弔盧能遠矣莫問曹溪禪湏陽峽裏不必聽妖

猿直下廣州城中去城中公卿多自賢醫官酒庫亦是
官善事使長官無難此心不與物俱轉三年偃息人已
安著就新書不妨似陸賈若論功名正恐陸賈出君下
林間荔子海中魚瓦甌酒醒日日沾千歲之棗安得長
相寄人來時寄廣州書

送皮德昭之官武林

羨子才如渥洼馬萬騎嘶風俱在下霜蹄如電不足飛
天上良星愁空靶如何不歸十二閑遠放江南沙草間

一朝馳入東吳去去看錦繡舊江山故宮土花無點碧
騁懷流水誰移得萬古乾坤萬古空英雄無淚可輕滴
回首一百六十年間將議論當籌邊諸公何恃恃江水
江水解容偷渡船璧月無情瓊樹老遺恨滿腔不能道
留連一曲後庭花待得楊堅何草草海門自闢潮自來
禮華樂葉俱寒灰東風漸搖堤畔柳鴈雪欲挹湖邊梅
平生欠作經行處羨子東行問征路一官何用計崇卑
好聽吳儂詫新句嗟哉與子如有緣相逢相別不期然

龍杖堪騎定相訪
馬塍花下酒如川

郝思溫大字歌

號東山雪
菴高弟

東山手提雪菴筆
筆中出此萬鈞力
重如岱岳鎮坤維
奇如古鼎躍泗側
點如滄海之碣石
直如叅天之古栢
曲如老龍恣盤拏
橫如方城立鉄壁
快如大澤斬蛇劍
妖夔幻魑俱辟易
巨靈引指太華擘
三千獅子座舉臂
可移得偶然揮毫
闕世間世間壯士
不能擲瘞鶴銘摩
崖碑後來者誰誰
繼之我嘗見龍溪
之字大如箕五百

年間無此奇雪庵老東山子優鉢曇花重現世崑崙以
為筆東溟以為硯青天以為紙為我寫太平兩大字持
獻天皇九九八十一萬歲我歌爾字我老矣

題江南烟雨騎驢圖

風發發雨瀟瀟渡船未度山相招騎驢不知前路遙前
路遙抵何處南山之南且穩佳莫向長安街上去京尹
今無韓吏部

送朱縣尉之官贛城

秋風吹船上重灘前茅未到聲先傳官能捕賊如捕鼠
直擣狡穴不一全上功得賞來此郡威懾獷悍皆服田
城南城北雨新足香稻滿野歌盈川衙空吏瘠弓力廢
尋常舊業開芸編鬱孤臺高俯流水崆峒山碧迎寒烟
張梨如孟柿勝蜜美酒可飲不直錢茶山詩派有續者
隨時倡和多新篇聖朝無煩上封事第一莫學吳門仙
方今儒臣易進用九遷何用終三年

菊歌

山水之村沙路乾風清日美情閒閒松林公子好事者
千株異菊培庭間素娥天孫娛清夜從以羣仙彩鸞跨
盡收四天五色雲巧粧絕艷鬪新雅紅玉琢成深淺紅
赤金抽瓣金瓏璫推水妙手簇水蘊間以孔雀堆紫茸
洛陽牡丹杜家譜西園芍藥何足數造化工多良獨難
逢花不賞將何歡君當歌我當舞花亦欣欣欲相語不
須定限一日三百杯不須腰鼓百面如春雷但願樽中
長不竭諸公長在花長開世換花花換世移根改色年

年異一番花樣一番奇看到伐毛洗髓幾番時

送程學士

洞庭之水銀河通手提白筆行清風歸來綠野按幽事
青山低昂馬影中時從賓客娛泉石不省麒麟誰第一
中使傳宣下九天關河秋光照飛驛彤庭引見宮雲開
問御安在今肯來

闕

映天顏喜百辟在列俱首回

皇元經制宰九有曾侍先皇討論久登庸耆俊徵舊聞
宗社靈長自天祐中書堂中庶務清四方萬姓歌升平

應無闕事可商畧定見房杜藏功能我從諸生立門下
別公敢把深衷寫子房歸計未足高伊吕元非退身者
力竭忠嘉荅主知闕
此東南誰當續玉庭石介頌
眎千萬祀無窮期

魯港行

闕
西來天塹長大波如山險莫當黃蘆未花秋黍熟

欲弔闕
空蒼茫十六年間老師相格天勲業伊周上

儀真使容闕
襄陽將軍儘降將西園價積鄮塢金

伴食光禹趨雄禁法宮穆清坐高拱赤舄雍容衆口瘖
葛嶺祥烟籠甲第吳娃理曲爭新媚珊瑚枝邊酒影春
水晶簾外花香醉主君十年萬年計甲光如水邊風寒
虛傳奇士畫三策臨危諱病醫良難古來何限韓擒虎
天馬如神解飛渡出師拜表真孔明不計闕九節度
半閒堂前香歸塗閣中諸客今何如前時晉公魏公語
今日驩堯苗鯨書殘月無情上陽曉木綿破闕閩山道
潮落潮生人不歸陌上花開幾番好

采石

驚濤萬里來無極
虞公中興偶成績
百年俯仰感慨多
事不天假終無益
君不見李太白高才絕世何不直
但令供奉行醉墨
倉卒纔為冰玉容
萬里漂流夜郎謫
人生有知當自適
飛絮浮雲本無碍
青山丘墓何足惜
向來金鑾殿日落
孤鳴秋草碧

車碌碌

車碌碌車上行人雪中宿
三更驅驢聲陸續
頓撼肝腸

眩心目霜棱飛刀風激鏃荒郵無烟抱空腹索駝不收
馬成簇暗裏低心避羣牧望斷海光上東旭木末天低
星煜煜

黃河道

黃河道漠漠黃沙覆枯草依然南北兩空堤堤上畊人
長桑棗人心百計當若為古來河水今南移平原縣前
好沽酒車夫鞭驢莫回首

龍灣阻風次日舟人必行解舟風回喜賦

東風吹船行西風留船住
蓬鬆黃頭郎作底使風去
蘆蓬兩扇當江開船船相趲
風初回龍淵烟氣隔洲失
宣化山光隨棹來潮頭又上
推船走一時便過新河口
兩人勝負蓬底棋船行遲速
人不知黃頭郎穩扶柁信風
宿大信肉色花枝紅采石
酒波春水綠

長風沙

長風沙酒旗斜風沙有情
留郎住勸郎莫向前江去
前江去轉風波牛渚圻邊
須過得皇天蕩裏奈郎何
郎船

但繫門前柳，唱曲好歌勸。郎酒與郎不是平生親，憐郎却願郎長久。郎今必去，當何為教郎解有思人時。

山礪礪

山礪礪石礪礪，一灘翻下一灘惡。青衫黃帽扶招竿，鉗鋒如戟波心攢。打槳失手能盪過，扶竿失眼船隨破。三山城中女如花，高樓酒賤多魚鰕。荔支林中尋屋住，上灘難轉莫歸去。

冲虛宮景真堂

怡山東麓堂靜深欲尋真景真難尋華鐘時發貞明韵

王審知時

秀木遞懸天監陰

王伯梁天監中飛昇

天風颼颼吹余髮戲

綰幽藤作條脫騎鳳簫驚烏石雲降龍劍照古山月丹

爐藥竈長周旋六時采擷三芝鮮蓬萊書札失幽約幾

度歸潮深碧烟

了娘囡

了娘囡西禪寺裏粥鼓鳴殿前殿後荔枝密葉落當掃
草久生衣裙潔峭苔鉏輕戲將苔石門敲鏗廊陰同伴

笑相謔話字難通知有情紺園花香日易晚行童遲打
昏鐘聲

古秋夜長晴雨

壁帶懸素琴衝牙起瑤林月寒文甃百蟲語簾外桂花
香雪深綉茵暗輟雙龍枕紋笥密收團鳳錦西隣少婦
笑齊眉寶帳芙蓉攜醉歸獨自佳期長是誤璿霜欲下
雁驚飛

又

雪浪流碧虛雨花散前除西風紅葉石欄曲盡并寒聲
歸綺疏回文讀罷雙蛾斂城上啼烏稀漏點東家嬌小
乍迎郎沉水銀篝殘晚粧燈裏鏡臺閒自照紅顏相似
夜偏長

題盧鴻十志圖

崖欲脫峯欲飛水灑灑烟熹熹石間老樹不老色翳蘿
懸陰石入黑調琴未了趣觀泉十處竒蹤日相迫紫虛
萬里丹霞開直上倒景之高臺佳雲好花滿嵩少仙友

為我今歸來莫嫌登山脚曾踏東都路姚崇宋璟可人
故不然豈肯容易出山去

擬峴臺

擬峴臺山如盃樹如苔臺前東風花亂開流雲藏雨花
間來花根得雨新綠催花枝隨雨成香泥神工鞭策不
停手七尺容形爭好醜桐林領頭木香酒百錢一盞當
酤否

雪中度崇仁望仙峰

游樂之溪清可浴天風剌剌山盤盤愈行愈深愈幽邃
疑有仙者棲神丹樛木怪藤鳥鳴荅綠潭青壁龍嬉蟠
裊徊賞愛不能已步步駐目搖荒寒寒雲平凝帝帷安
急霰亂下珠璣完忽而兩崖蒼蒼散花雪板橋石路浮
雲乾交迎密撲迷欲眩怯下疑高行自難凭澗茅房所
居雅叩門烟火相依安澄渟夜氣造寧極嬰冒曉凍追
殊觀忍觸瓏璵縱健踏喜聆環朗藏鳴湍垂綈不動偃
杉竹懸柱偶脫爭崑巒前源未窮取危磴直上百折陵

巔岼新介痕痕過飢虎高翰葉葉遊飛鸞俄然獨立倚
霄漢波濤翻海鎔銀寬雙瞳四徹洞萬境肯與塵界循
憂端蹇余看雪知幾處何如此時望仙峰上看仙之人
兮來不來浩浩元氣與我同朝餐

題五馬獵歸圖

秋野肅肅秋草萋萋天空雁度呼鷹時一馬前行四馬
隨前者回顧相指揮最後兩人俱下馬一人拱手俯聽
之一人挈囊毛色肥角方在矧箭在房人馬意態何遲

遲知從底處射獵歸莫是營州少年并州兒閒中貌此
知為誰筆力精勁妙莫窺我疑此畫有似汲冢古書出
蠹簡殘逸有缺遺不須完足自可寶古人日遠何由追
嗚呼古人日遠何由追

黃氏南園歌

南園花南園花白於雪紅於霞深處定有仙人家花陰
亂駐七香車山香儘舞花不老花艷直上搖金鴉瓊膏
一吸香入骨醉呵金鴉不令斜南園竹南園竹寒於冰

綠於玉割得何天土一丘炎官雖炎誰敢酷天山太古
雪皎皎蓬萊絕境風蕭蕭白鶴翻空啼一聲下占清陰
對棋局君不見古南園錦茵紅皺琵琶弦珊瑚碧樹沉
水烟嘉賓列坐鼓咽咽白石詩句吟成編放翁記文筆
如椽挾策博塞若為賢撫掌一笑睨青天不如花竹之
間汲清泉且取粟粒香芽煎

題五公寺壁畫古栢

陂陀堆趺挺雙栢槎牙直上不可計尋尺元氣所融結

通身骨力醜怪形狀古黧色作柱擎天等閒事世間萬
木俱難敵栢根水流滔滔鼓舞風雷吞吐日月闕惟
有雙栢牢萬牛回首參天高看得孔明事業如鴻毛

由寶塘舟行至臨汝

盧鴻十志看不足愛雪貪行雪相逐晴風吹散圯山寒
三十六陂水初綠黃洲拏得罩蓬船松筠繚遶烟成淵
波聲疊下灘聲惡鮑照却歌行路難

山中樂效歐陽公

東方風回春山道
趵暖行歌霽華早
溪源露歇逢藥苗
石徑烟輕掇芝草
紅英灑地燕將乳
綠樹添陰鶯未老
入簑魚鰕朝赴饌
傾筐笋蕨夕供芼
山中之樂誰得知
我獨知之來何為
水竹沙頭閒檢校
村村簫鼓太平時

又

堤柳綠搖新罨畫
石榴紅摺嬌裙衩
蓮蕩風閒翡翠敲
菱塘雨定鴛鴦下
溪女浣紗朝出村
行官飲水暮歸舍
瓦瓶手挈隔年醅
石下坐園明月夜
山中之樂誰得知

我獨知之來何為空裡烏蟾飛影過桑麻課效勝書帷

又

空山一夜生新雨涼起賞心千萬緒扇團自守不依人
桐葉知幾尋脫路隔隴笑談雜樵牧臨流賓從惟鷗鷺
懸庖蘆服美勝酥精浙新杭香滿戶山中之樂誰得知
我獨知之來何為青林紅樹人烟溼護得金橙密處垂

又

千花重作陽春節野杏山桃隨處發莫思前度看花誰

已見新墳芳草歇，穆山山下數灣月。
華山山崖十丈雪，幽人獨在雪月中。
要與梅花成四絕，山中之樂誰得知。
我獨知之來何為，除却山家新臘醞。
世間無事可相宜。


龍霧洲

時大王有南行者

龍霧洲水油油中有驛，馳南越舟庾嶺瘴。
天雲不收直，到海邊天盡頭。
天盡頭海茫茫金珠璫，繁平斗量鴻毛。
性命此難忘，檻車何事招巫陽。
不如回雁峰前鴈，鴈門舊侶年年見。

陵山館辭

陵山兮蒼蒼仙之人兮何鄉
遭余陟兮巘嶮援碧藟兮
迴以遠草髣髴兮華續續
頤下方兮凝翠氛空館兮延
佇待來不來兮眇空碧七
鶴駕兮曷追渺余懷兮悵
惻煜三秀兮潔餐羌靜貯
兮陵山挹太清兮撫玄極
聊逍遙兮永終日



知非堂稿卷四

欽定四庫全書

集部

知非堂稿卷五

詳校官中書臣孫衡

侍讀臣孫球覆勘

總校官原任中允臣王燕緒

校對官中書臣吳俊

謄錄監生臣董邦本

欽定四庫全書

知非堂稿卷五

元 何中 撰

七言律詩

與胡山村

九萬風高力控搏偶然倦翼墮塵寰間說到乾坤外
知己誰當伯仲間何地可堪容一榻亂雲相隔失三山
方來亦有無窮在未必先生可得閒

又

平生再拜一何難
昉得陪從杖屨歡
大節熟聞諸父語
高風還許後生看
茶邊道義松風晝
酒外興亡竹雨寒
別去幾時能聽法
秋深桂馥重凭欄

送李仲章遠遊

風笛無聲笑指空
出門誰碍更求通
一帆千里客何遠
王氣雄圖江自東
赤壁驚烏飛夜月
衡陽看雁落秋風
人間興廢不須問
詩在江潭柳影中

秋懷

萬壑東歸晝夜流人間自是本無愁不悲白骨塌秋井
尚恨華屋歸山丘此事直須一杯酒只今何用萬里侯
明朝且可尋黃獨荷鋤徑往西山秋

又

采采蘋花可佩香依依橘袖未全黃人行塞北非征戍
雁過江南有稻粱短笛疎鐘來別浦亂鴉飛鷺共斜陽
西風擾擾知何似看見黃花滿地霜

歲菊

黃玉為裝好自修天寒身被翠雲裘直於歲暮標明節
那向人間立晚秋湘澤忠臣終戀楚柴桑處士不歸劉
漫將二老閒題品寒照疎籬一片愁

除夜

身外須知總是空書生何處覓窮通自緣一歲今宵盡
獨坐殘更數刻中學有淺深心勿畫詩無今古句難工
不知春到池塘未一夜簷間花信風

閱穆陵丙辰御賜進士詩

後代忠臣摧丙辰穆陵魂斷北征人
長江浩浩傾吳越
九野荒荒嘯鬼神
鵑血縱乾難返蜀
烏頭未改竟留秦
琵琶絕域千年恨
青塚黃雲不識春

大水

漠漠陰寒寂寂秋
濁波如屋蔽空浮
聚灰莫試媧皇手
銜石虛存精衛謀
逝矣棟梁歸大壑
纍然盆盎塞中流
鷓鴣聲苦行人斷
且向江頭具小舟

雨中

雨滿寒空風滿林
閉門十日自悲吟
不知衾從誰語
尚許傾陽見寸心
書史軒窗雲氣潤
蕙蘭蹊徑蘚花深
好風為我吹晴未
欲釣清溪坐柳陰

又

炎夏如秋氣已還
老天奇變亦多端
山橫北牖陰雲合
人對南山暮雨寒
江海窮居無米易
古今過意得詩難
蟲花落盡幽禽語
坐看千林擁翠瀾

八月二十八日

黃竹哀歌世偶傳佳期應待後十年曲江宮外看蒲柳
凝碧池邊聽管弦古往今來人化鶴天長地久帝為鵲
蓬萊水淺應聞似徐福歸舟已失仙

夜立

冥冥無復辨秋毫天映諸峰湧翠濤萬里明河流眼去
三更獨雁倚風高南鄰締綌秋難貸隔舍歌呼夜更豪
只有殷勤木上坐共聽枯葉響蕭騷

臨川道中

路隨一水曳長烟
杖入重雲擁亂山
過眼向來華屋處
寸心不挽盛時還
紛紛世故行人亂
漠漠林霏白鷺閒
忽遇長空飛驟雨
春泉一派落松間

穆山書事

螺蟲三百有六十
其長相殘更斷魂
細與漁樵商世事
獨尋闕梵到松根
蟬鳴晚日濃時樹
鴉落秋烟淡處村
難覓飛車遊海外
直隨藜杖信乾坤

晚步

歡適常看好景稠悲吟偏覺滿空愁
碧雲忽作紅霞合翠靄俄成紫氣浮
茄紫山城鴉翅亂人歸江路馬聲遒
老天遺我多奇變著在江南澤國秋

曉晴

雨意將闌天自休
細穿詰曲聽鉤輶
千山欲曙微霞吐
萬木含春溼翠浮
孤塔遠知城尚近
空江猶似古來流
遶汀花落白於雪
掠地風來嚴似秋

孺子亭

先生不是早知機所恨諸賢喜有爲共立名稱空自異
竟成朋黨最堪悲當時僅許陳蕃識此意只應梅福知
亦見祠邊丞相宅滿牆幽草綠參差

登滕王閣

洪崖山前樹歷歷石頭渡上烟漠漠龍分片雨過秋水
鷗倚西風窺斷城吏部文章餘簡冊前王名姓老圖經
登臨已費三十載草草忽令詩句成

次韵彭希爽吳景傳約遊穆山

穆山祇在白雲隈
擘石為門任去來
兩澗寒聲通法席
數峰秋影上香臺
林深僧梵含風遠
嶺隔山樵戴月回
此地能令高興到
中秋又近桂方開

興化軍冲虛宮贈陳虛一尊師

兀兀山林棲遯身
洞天深處振行塵
客如种放豈樵者
師似彌明非世人
丹水汲餘山月淡
異書評就海花新
他時說看逢闕事
皇慶行天第二春

舟中

遠送孤帆波渺渺深籠寒靄樹稀稀象牙潭上風初急
龍霧洲前雪亂飛山掩孤鐘分響到沙盟叢雁逐行歸
彫房熾炭行時令何如癡漁擁斷磯

黃氏石闌

此地何年石作闌石稜不共蘚花刊四時勝日園芳草
一塢春風護牡丹洛社賞心遺記在善和先志舊書完
明年一鶚清秋上文石斑高萬目看

諭仲本詩集

鮫室成綃別是機，向人定價每疑非。
寒通海底珊瑚樹，秋漾天邊寶劍輝。
虎瑟含風蒼洞遠，鸞笙戴月碧雲稀。
幾回剪盡西牕燭，又聽山鐘數杵飛。

次雪溪上人秋興韵

靈峰寺裏講時茶，啜處銅爐一篆嘉。
揮麈微言穿溟滓，題詩險韻趁車斜。
風回過雁松移影，烟隱寒鐘桂重花。
祇有新吟猶習氣，自餘諸事鬢今華。

答清江皮李賢見寄

古人十里夢相求咫尺翻增隔絕愁雲護牋題醒處墨
雨深樹色綠邊樓文章正法追前哲句律新功卻俗流
為問幾時談到劇壽楓南畔菊花秋

送族弟元迪

老去逢人怯送行弟兄分手若為情明時難便高才隱
為客當令遠業成桂嶺寒烟通郢樹逍遙夜雨入彭城
明朝便自堪回首不待秋風過雁聲

寄唐正之

幾驛相望兩鬢華
書題不寄雁行斜
但令天下稱知己
可為江南故憶家
樂毅臺空烟在樹
魯連城圯雨殘花
燕齊勝事多收拾
定有新詩處處嘉

觀除目有感寄皮德昭

偶將除目到幽憲
坐對撐犁事滿腔
知是乘桴欲浮海
如何陋巷問為邦
一庭月冷驚秋照
三寺鐘聲接遠撞
聽罷無眠閒憶得
灰心底用要心降

贈直心苦口道人

涼氣將深暑氣收芳華零落思悠悠道人心口如神驗
我輩窮通與道侔鶴為乘軒能致妬馬因立仗却招尤
世間只有閒鷗鷺野水如天得自由

無題

鴉尋流水遶村迷雁失寒荇落渚遲老杜舊傳餐玉法
馬遷新睹采薇詩譚空漸入皆空境觀物寧非閑物時
閒憶年年溪上路梅花開遍向南枝

舟中次涂雲章韻

久矣坐忘如子微元非強學介之推良工未肯闕樗散
新學何為迎覽師山路雪深聯轡穩江流風淡落船遲
此時此景周旋好長遣閒中費夢思

題崔伯明詩卷

海底珊瑚不易收俄然在手醒雙眸
媧皇煉石天無鑿織女機絲月共秋
一草作花生自別三年刻楮巧堪羞
客牕燈影誰為伴雨響空欄徹夜流

壽黃希尹

壽星移次東禪近甘雨生涼晚梵宜心地平平真活佛
書鄉郁郁有佳兒春濃寶樹開花處日麗丹砂擲米時
知是文吳俱不老三神山碧酒盈卮

送郭竹堂赴南臺

聖代人英第一流霜臺粉省總優游我知陳阮誰爭長
人詫皋夔可與侔願作良臣安用激親逢治世更須憂
六朝形勢江山在且與諸公共唱酬

題皮李武所抄吳草廬周棲梧孫少初皮李賢

四十年前閤皂碧崖聯句後

皂嶺清遊記昔年
彌明傑句儘難聯
公如樂正超諸友
我似延年咏五賢
自古高才須蓋代
無前偉績定由天
世間何限經綸手
獨立蒼茫意不傳

答諭仲本

閒身未必受人羈
為要攜書教阿宜
素學日從前哲究
此心偏與古人知
由然柳下聊同俗
老矣徐娘已昔時
只道暮雲無用處
彩霞五色照天奇

答胡器之

記和車斜四韵詩誰期此別許多時但逢來客長相問
每向無人又入思心在不知身各老語深偏許策同枝
空雲聚散悠悠者底用閒愁挂一絲

贈丁教諭

芙蓉仙客果能仙百事精通不等閒未入漢庭陳奏牘
先從周制作醫官緩尋芳草多諳藥笑指遙岑便說山
已得一吾人印可更求數語與誰看

題陳達觀浪吟集

語淺遙知人意深仰難

闕

俯難臨緱山駕鶴月千頃

虎峽啼猿秋一襟斗極光寒天識劍闌城境絕客成琴
馬蹄飛電長安近直上鼇峰一萬尋

索氏雙頭蓮

芙蓉茁茁冠詩騷一萼雙花少所遭周日夷齊清並峙
堯天巢許潔同高石丁可是神仙侶楚閩終為兒女曹
臥雪門庭宜著此露香霞艷映蘭皋

送達海提領

軍山山下舊監州人物科場第一流
千尺棟梁宜九室一官朱墨費三秋
甘泉侍從須揚子貞觀封章欠馬周
從此金門多應制新詩能寄故人不

次吳草廬花晨韻

我知居士病全安難敵談鋒古本乾
花外偶迎風日美人間已作畫圖看
江行唱和今猶盛東見追陪意更謹
吟弄迢迢歸路好廓然天宇似增寬

再用韵答周昂霄

布襪青鞋試步安徐披山徑野花乾可欣久別能相聚
便有新詩得細看七尺形容終解老一時真契且交歡
百年尚遠身長健若比朝菌歲月寬

送唐伯昌曹州迎親

步往迎親此役宜五千里外快心期近曾讀律知名例
早事通經識孝慈鉅野天清細帙穩長江風淡布帆遲
企予相待封溪上楓葉蘆花秋盡時

由清江赤城觀至寶塔寺暮歸樟鎮

自笑野人多野思
並村隨處意閒閒
赤城觀裏折丹桂
寶塔寺前迎晚山
隔水歸樵分路散
衝嵐飛鳥認林還
祇言十里街頭近
不計黃昏便掩關

酬揭曼碩贈別

來日君還在我前
歸時我獨占君先
冰寒斷道鳴駝外
雪暗空村落雁邊
畫省諸公扶日月
南州孤客記山川
松聲多處黃精好
舉手青霞始學仙

任城南

自愛清遊自愴神
五千里外獨歸身
馬嘶平野呼鷹吏
犬吠寒沙射雁人
直北關山初合凍
近南氣候漸知春
蒼苔白石梅花路
長憶驅車魯水濱

魯橋發舟喜賦

幾驛荒程不候鷄
坐車和夢向南馳
纔辭薛國沿清泗
已指彭城望下邳
榆柳無情隨日變
風霜有力待人知

二王臺下船如織
誰薦香蘋酌一卮

沛縣上濮王
項王二臺

秋夜獨立有懷

秋老谿貧獨夜時
筇枝移徧響蟲飛
山城鼓疊月生海
林屋燈寒風動扉
帶雪關河人別久
隔天書札雁來稀
忘情闕有難忘者
黃葉一庭霜滿衣

偶成

初啼山鳥篆香斜
在再明時翫歲華
三日雨深春在水
一林烟溼暖生花
尋盟舊卷鈎簾展
開禁新醅隔竹賒
却憶去年歸漸近
半蓬殘雪上寒沙

士子元夕

闕

市人

闕

啼倦鴉常年歌吹稍喧譁夜風十里滅燈影

春雪一林寒杏花凍潭漸深緘蟄戶新灘微壯奪鷗沙
西林樵客同爐炭閒試香芳品薺茶

陳虛一尊師山房雨後

一片閒心倚石壇千峰向背碧當軒海門雨氣懸虹影
洞府香風粲鶴言絕艷槿花深映戶生紅荔子密園村
早知千里移家近久辨黃岡十畝園

黃岡多荔枝

寄鄉信

謠俗傖荒越下州西風孤旅倦悠悠酒醺女靜花落樹
魚市人歸潮滿溝鄉夢頻經關上月書題分寄海邊秋
已期待臘西村畔春在梅花雪映洲

種菊久客遂爾蕪蔓扶植成詩

菰菊幽灣種種殊偶然久客遂秋蕪旋栽竹架扶枝憊
頻汲泉花救本枯曉露漸寒覘綻否夜風微動覺香無
幾多名品人應識倘有良工入畫圖

得家信

俗尚難公不取諧木陰深處玩蒼苔身拋世累終相著
心怯鄉書重一開極目雲天鴉陣黑滿林風雨雁聲來
平生最有看花癖何處溪頭發早梅

遇揭曼碩有贈

時持賜其父荀坡貞
文先生奉勅立碑

十年相隔忽相見猶記書題獨故人京闕詩傳多應制
里門碑建獨榮親梅花滿映林扉雪柳眼初迷輦路春
知是高情難去住此身誰是自由身

新塗畝步作

松筠色潤翠成圍，鵝鴨聲多水漸肥。
隔野敗人爭野路，迎年姹女試新衣。
暖烟黃柳知春到，殘雪青山伴客歸。
茅屋酒旗隨處有，悠悠世事儘相違。

黃籀醮

道真法力貫穹圻，炯炯靈襟感應機。
萬里東風人獨立，一天杳霧鶴雙飛。
瑤壇封事披雲徹，碧海遊仙戴月歸。
恰是廣寒新醮罷，夜來花雨打牕扉。

元日

聖主龍飛肇紀元
野人相賀板扉前
不知顏色老昨日
共詫時光勝舊年
井口杏花春食雨
墻匡柳蕊暖肥烟
長溝緩繞風猗綠
林下烏捷漸受鞭

讀荆公集

古來遇合幾君臣
無奈生為叔世身
大志本難酌遠業
諸公同是忌南人
風高碧漢孤翻翻
波蕩滄溟獨縱鱗
每恨孔明參佐劣
費禕蔣琬儘難倫

又

持方試藥詭能醫失著推枰却付誰東閣招延賓履散
彤庭撫問使車馳蔣山舊宅僧堪託白下新詩柳最知
宇宙茫茫經世事周官今又廢多時

寄智玉成

僧來能說近平安密抱陳編獨細看每恨故人疎覲易
無情估客寄聲難四窻人寂百蟲語千里夢回新雁寒
心事書題俱草草西山幾疊碧雲端

閤皂山福地

兩崖松竹綠蕭蕭時聽岩陰響野樵鶴信早歸題錄客
蜂房分綴鍊丹寮晉時月在塗源淺粵國雲通勾漏遙
仙馭肯忘僑鼎地風笙清夜落璫霄

題墨梅

江北江南春又動臘前臘後梅仍花三點五點雪孕魄
一梢兩梢鐵擘杈枯根健迸石色潤半身倒偃溪流斜
逃禪老人招不得樹穴探環今是邪

題石橋

未許興公知此山應真飛錫於其間陰凝黑霓落半跨
夜凍銀河僵一灣偃月光通空翠眩回風聲靜雨花閒
山中仙人渺何許去鶴三招殊未還

乙丑元日

村北村南笑語通銅鑪香燼蠟燭融寒雞四起野霜縞
清磬一聲天海紅老大情懷元壯士太平田里有東風
續經且遜河汾手只擬新桃亦未工

後正月廿六日有喜

縱橫亂帙翳山家且聽雙松啼乳鴉三日暖風生野色
一川酥雨入桃花木多山市無人問恩重綸音有客誇
贏得乘閒隨喜去溶溶春水遠平沙

鄒悅道哀詞

八牕九室失般倬善斲無人轉可悲曾就功名遭記錄
竟將文字老明時門生定展王通學舊友誰成郭泰碑
無限哀悰歌不徹落花如雨暮雲垂

自羅源公溪尋梅得之喜賦

羅源波畔野梅稀
流水油油引步遲
曲塢深烟將淡處
前峰薄雪欲消時
槎摧鐵榦綠苔點
梢拔霜條丹萼敲
說影談香花定厭
迎寒袖手倚疎籬

會吳學士于山水村

仙家山水鬱葱邊
今日重來翰苑仙
五百里間星象動

一千年外畫圖傳

晦菴畫於聚星亭

寒泉會粹書還就
短簡賡

酬句倍鮮不待職
方添記註門生語
錄已成編

黃氏塵外亭

金華仙子與神謀別有乾坤作勝遊
天外客來談太極
洞中日永對紋楸花香四合島霞曉
笙響一飛山月秋
誰道蓬萊三萬里一壺元只在街頭

壽吳草廬八十

四朝加禮聘車勤又際龍飛沐異恩
聖主執經常賜坐
大官承學盡趨門格天勲業身徐退
平地神仙道愈尊
春有八十纔八十桃花紅嫩酒盈樽

題金石錄

即雲萍錄

胸中舒卷任閒情
塵介何由置重輕
虞子自知書可著
伯夷非待史為名
碧雲一夕度歸雁
紅雨千林啼晚鶯
聚散偶然無足計
世間甲子又新晴

贈墨者侯生

遠心每計百年寬
壯事俄歸兩鬢斑
周鳳不鳴詩已廢
魯麟無迹史難刪
寒陰十日雨花急
長嘯一聲雲影還
多謝侯生墨如漆
草堂無字可編攔

庚午上元

是年江西大饑

九野淒涼魂不招又知今夕是何宵叢祠月黑寒鴟聒
山市烟深鴈雪消遺事誰編傳舊俗夢華有記錄前朝
一枝柏燭闕然處香譜茶經共寂寥

楓陂卽事

幾杯殘雪寄遙岑一舸輕嵐並曲潯晴氣貫山虹碧動
暘光著柳粉黃深衣裳炫路通隣里鼓笛粘燈貼杜林
左顧右瞻忘費日老人態度少年心

七言排律

黃養浩得水石山有詩自和索余同賦

壺中未識九華奇
先讀坡公唱和詩
天竺分峰應佛送
仇池通穴許仙窺
拾時山靜雲相伴
歸處家遙月共隨
書史軒牕多勝賞
蕙蘭蹊徑換幽規
花邊汲井泉頻滌
竹下安盆几隱_闕
百匝端詳無_闕
喜四隣驚訝頗成疑
家童習懶愁添約
野客生貪黠欲攜
已廢朝眠迎露立
更疎晚講對霞敲
人言每事皆為累
我謂高情未易知

儘見蓬萊幾清淺
菖蒲遮莫待花遲

知非堂稿卷五

欽定四庫全書

知非堂稿卷六

元 何中 撰

七言絕句

穆山

寒雲十里踏沙堤，斷雁數聲心自悲。
不見悠悠官道上，前人已遠後人遲。

舟夜

拓去蓬窻月滿襟，蕭蕭驚雁墮哀音。
不知天意何倉卒，

數疊寒雲萬里陰

訪曾士益

釀雪不成雲未闌
樓危笛裂雁聲殘
江南江北梅花夢
夢入空山共苦寒

海棠

冥鴻銜子錦川來
娟娟柔紅花數開
花睡未醒春未透
半空飛雨暗蒼苔

西嶼

野色山光儘可詩
倦來把定釣魚磯
晉成東去唐成晚
花信無風春自歸

即事

落紅瑟瑟疊蒼苔
古徑無人獨到來
野蝶山蜂渾不見
春風更許草花開

江行

悠悠行客漸黃昏
隔浦人家已掩門
誰與飛漚遊海上
亂鴉無數下西村

雪

天風搖動玉京移九野蒼茫一望時
老樹細觀猶似舊
好山何處不堪疑

其二

我疑玄帝巧鋪張萬落千村入混茫
但得減租寬物役
何須如許壓遺蝗

其三

前鋒飛霰決雲馳後拒獐獐裂地吹江上
梅羞顏掩玉

崖邊松老鬚成絲

其四

汲竇烹茶火未殘
敲詩刻燭夜將闌
征鞍擾擾江南北
似是梅花怨苦寒

清明

墟落無烟草樹昏
一樽蕭索酹殘春
吳陵晉廟淒風雨
那怪荒阡少祭人

夕陽

夕陽盡入笛聲中兩岸樵漁一水通楊柳已疎楓漸落
黃花渾未識秋風

昨夜

池蛙鼓吹已成癡穴蟻侯王更自迷昨夜孤窻何所似
三更風雨五更雞

落葉

當春已惜片花飛綠葉成陰事轉非啼鳥喚驚人夢覺
秋風零落葉全稀

獨來

黃花自是最難開
待得開時我獨來
籬落不知天地晚
何人却採落英回

絕句

山似芙蓉向晚開
水如羅帶東林迴
世間只有閒鷗鷺
立盡寒空待我來

楊花

萬點楊花倚石開
十層樓葉下山來
諸峰窅窅深春綠

獨自衝烟看幾回

次史葯房池上卽事韻

萬蕊蜚香百草芽
簾旌不動柳陰斜
幽禽還識欄邊客
曾立東風仗外花

夏日偶成

香透池荷入戶生
靜如老宿不看經
一林深綠清風度
遞出玄蟬長短聲

登高

數峰高聳萬峰低
看到斜陽意欲迷
一朵碧雲深淺碧
殷勤只在數峰西

隨興三首

路轉林深香未窮
林光盡處麥光通
長安花落朝三殿
曾有桑麻萬世功

其二

紅雨絲絲綠漸深
萬年芳樹轉春陰
畫梁幽谷誰輕重

鶯燕

闕

春覺

闕

心

其三

闕

空香靜牡丹寒遠笛聲沉恨未殘寂寞繁華今古共
一溪晴雨倚欄杆

對櫻桃

淡淡春烟淡淡風兩村桑柘翠相通東皇太一功成去
熟徧櫻桃一樹紅

雨行

手決飛雲未易排幸逢佳樹不相猜數聲急櫓隔林去

一陣歸鴻衝雨來

秋原

稻花香裏聽潺湲
路入高原攢草閒
生長太平無所用
且隨殘照看秋山

小齋獨坐

老蘇朱墨十分工
應笑林間遠世蹤
翠樹玄蟬秋滿院
更添何處一聲鐘

初春

年華來去野梅識春意淺深沙柳知偶到前村閒指點
數峰殘雪淡晴時

雨中遣興

萬壑千巖夢寂寥飛涼落澗夜蕭蕭覺來忽聽兒童說
昨日榕陰有石橋

二

來時榴樹絳雲遮今見孟孟墜顚斜莫待鏡中頭盡白
閒情都付粵東花

三

雙魚容易託飛郵
潮水無情上劍州
占得千峯深處住
門前溪水更西流

聽雨

山家祇隔面前山
慣得書題不往還
秋色定隨連夜雨
幽花細草滿西灣

題雲煙疊嶂圖

古木蒼蒼定有村
千峰猶帶雨餘雲
逢人却問橋東事

林外飛流壯幾分

題錢舜舉小景

綠樹深深波渺渺書樓高映碧峰寒柴門掃就無人到

未必能令

闕

看

題觀瀾圖

三間茆屋下書帷喬木森森密蔭垂萬壑千岩人不
到
靜看山下出泉時

題魯祖說詩集

貫珠編玉粲寒牕紅燭搖花省漏長斷雁繞雲飛不下
數聲瑤瑟起瀟湘

豐城道中

一洲烟氣一洲寒沙尾飛鷗勝我閒前日西山今不見
雲來猶自想西山

雪中戲成

我是天仙第一流水晶帆跨玉龍遊千岩萬壑冰壺裏
神觀清明得自由

題瀟湘秋色圖

瑤瑟無聲水自流
黃蘆黃葉滿汀洲
蘋花欲采無尋處
一片閒情萬古愁

穆山

一陂凝綠倒垂天
直上層峯積翠邊
迢遞烟雲三百曲
水聲徐出石門前

又

老木懸崖徑最峭
山風刺刺水蕭蕭
緣源不記梅栽處

忽遇微風在石橋

客來

綠樹陰邊翡翠飛
笑吟佳客坐書帷
井華汲就茶烟發
看罷數峯秋雨時

維揚道中

淮天如水水如秋
葉葉漁郎下釣舟
北畔荷花南畔柳
殷勤送我到揚州

二

香霏滿棹渡長溝濃著秋光淺著愁日暮女郎清唱發
鴛鴦斜拂柳邊洲

三

聚柳成村水一灣

闕

鷗分趂棹歌還今宵繫纜知何處

好在紅菱紫蓼間

無題

玉雪容華翡翠衣帽青貼領髮雲飛共郎急趂斜陽渡
不惜黃沙走馬歸

二

慣得驕驄識妾家
佛桑庭院繡簾斜
鏤銀合子檳榔片
戲噴猩紅散唾花

三

天妃廟前斜日時
女郎歌斷綵鴛飛
林花滿地瓜船散
城裏官人排馬歸

四

烏石山前颭酒旗
醉來健倒日平西
蔡家石刻端明字

賣與他人作墓題

五

丞相堂前草暗堦尚書池上樹生苔子魚風起秋無路
記得誰家甲第開

題陳舜卿龍卷

舜卿名俞丙辰進士草亭其自號

妙舞當年色藝精吳宮晏罷夢難醒早知畫得龍千卷
留與閒人記草亭

送人遊玉笥山

咫尺簫仙玉筍家水香二十四溪霞攜書便欲隨君去
長向雲間掃落花

邛溝

衰柳殘荷併慘然青山隔岸弄嬋娟多情惟有邛溝水
長送江南過客船

見梅花

冰合金河雪暗殘內家難覓一枝寒祇應獨結梅花伴
水遠山長信意看

微雨

一天微雨溼芳塵
紅綠相依幾聚春
家在海棠花下住
傷心長是未歸人

放船

晚色重重放客舟
輕風吹漾落潮流
林巒盡異來時路
知是明朝到福州

莆陽歌

兩兩筠籃溼暖烟
窄衫短鬢裊行肩
到門迎著郎來早

持向街頭賣海鮮

黃沙道中

深淺寒烟曲塢間
杉皮小屋遶幽潺
紫苔青石梅花路
隨處閒看雪後山

山行隨興

暖風吹雨溼平沙
遠色疑青草欲芽
誰是多情能愛我
野梅一路顰前花

又

金石臺前鴉亂飛，空濛山影出陰霏。
野塘水活柳生眼，茅舍聚人迎婦歸。

清江道間阻雨

峰影微昏樹影明，人烟深淺水縱橫。
前時逢雪今逢雨，長在江南畫裏行。

凌雲山房雪中

山寺孤鐘撼曉殘，西窻窻外玉珊珊。
開門忘却階前石，驚問何人疊雪山。

又

萬頃寒輝貫碧霄
一林清響落金飈
梅花開就歸時路
莫待前山雪盡消

新淦藍步溪

陰靄通烟翠
作霏春風入
雨暖成泥
女郎挑菜不知溼
調笑相攜過水西

無題

喜遇佳期未有期
魯陽不見下春時
春風好長江南樹

長與閒人惜子規

西風

苦蓼花開錦換洲野夫容發艷通流東風即是西風骨
莫向西風誤作愁

喜雨

花事安排趣好晴沙膏新換牡丹坪明年何處看花客
一夜東窗喜雨聲

題墨菊

橘枳蘭芽玉易瑕商山一出便忘家幾回惆悵梅花別
併有緇塵到菊花

見棟花開

綠光深淺上窻紗
矻矻讐書髮已華
年譜他時誰記取
一株紅棟兩年花

酬友人見訪不遇

荷笠深山採藥回
荆扉石徑損秋苔
花邊稚子相迎說
昨日有人騎馬來

題趙太祖太宗蹴鞠圖

共戲笙歌聒處春他時甘作墜雲身一九明月樓頭

闕

山人解誤人

荷花

曲沼芙蓉映竹嘉綠紅相倚擁雲霞生來不得東風力
終作薰風第一花

立春近夜雨達旦

梅花天氣夜尤清清得還鄉夢不成知事新春隨雨到

四牕飛雨作春聲

除夜自封溪歸高淵

柳辭殘臘盡初垂
麥長平沙綠轉肥
寒日漸溫風漸軟
隨山隨水看梅歸

二

歸人元自少歸情
不計程期且緩行
沙步酒旂村鼓亂
連林鳥雀盡懽聲

三

鴛鴦翻雨戲迴溪溪路迢遙濕翠園隔竹杏花紅萬點
何因知我此時歸

四

鬢鴉橋北試春衣濃粉深脂潤畫眉板閣磚爐相聚處
欣然說著看燈時

五

蟻旋西礪轉東源竹掩松遮又幾村家在江南幽絕處
千峰帶雪繞柴門

豫章登舟作

城南無樹識神仙
閒往閒來四十年
西岸青山東岸塔
為誰相對老秋烟

象牙潭

水禽兩兩樹三三
近浦遙峰隔嫩嵐
新換一天秋色別
短篷又過象牙潭

絕句

芝谷山前日荷鋤
柴門生事轉蕭疎
放翁老去真堪笑

猶向人前說讀書

春風

杏花紅度海棠紅
綠展平沙拂嫩茸
共愛春風猶是舊
誰知不是舊春風

自笑


世情多識事多諳
長對雲山共笑談
煮石采芝隨意足
憑君莫唱望江南

豐城道中

江村南北笑聲頻紅燭花時次第新春水漸生桃葉渡
小舟時載嫁歸人

二

曲江灣處小瀟湘磯柳疎垂雁落行暫繫一蓬寒綠裏
數聲清響夜鳴榔



知非堂稿卷六